

**PRAVILNIK ZA DODJELU NAGRADA I ZAHVALNICA  
ARHITEKTONSKOG FAKULTETA UNIVERZITETA U SARAJEVU**

**I - OPĆE ODREDBE**

**Član 1.**

Ovim Pravilnikom u skladu sa Zakonom o visokom obrazovanju Kantona Sarajevo (u daljem tekstu Zakon) i Statutom Univerziteta u Sarajevu (u daljem tekstu Statut) precizno se definiraju kategorije, nazivi i forme nagrada Arhitektonskog fakulteta Univerziteta u Sarajevu (u daljem tekstu Fakultet), a u cilju promoviranja akademske i profesionalne izvrsnosti u provođenju nastavnog, naučno-istraživačkog i stručnog rada.

**Član 2.**

U skladu sa tradicijom dodjeljivanja nagrada Fakultet ustanovljuje sljedeće kategorije nagrađivanja:

- 1. Studentske nagrade Fakulteta,**
- 2. Studentske nagrade u saradnji sa različitim institucijama, firmama, udruženjima i fondacijama,**
- 3. Nagrade zaslužnim pojedincima za akademski/stručni doprinos arhitektonskoj profesiji i**
- 4. Zahvalnice firmama, fondacijama, udruženjima i pojedincima za uspješnu saradnju sa Fakultetom;**

**Član 3.**

Nagrade, definirane Članom 2. stavak 1. i 2. ovog Pravilnika, dodjeljuju se studentima sva tri ciklusa studija za studentske završne radove, semestralne projekte i naučno-istraživačke radove iz prethodne školske godine.

Nagrade, definirane Članom 2. stavak 1., dodjeljuju se na prijedlog Komisije za odabir studentskih radova i dodjelu studentskih nagrada Fakulteta (u daljem tekstu Komisija).

Nagrade, definirane Članom 2. stavak 2., dodjeljuju se na prijedlog privremene/Ad hoc Komisije za odabir studentskih radova i dodjelu studentskih nagrada iz određene oblasti, uže oblasti, predmeta ili studentskog natječaja.

Nagrade, definirane Članom 2. stavak 3., dodjeljuju se zaslužnim pojedincima za prepoznatljivi akademski i/ili stručni doprinos arhitektonskoj profesiji.

Zahvalnice, definirane Članom 2. stavak 4., dodjeljuju se firmama, fondacijama, udruženjima i pojedincima za uspješno okončanu saradnju sa Fakultetom, kao i za različite donacije, legate, poklone i zavještanja u prethodnoj školskoj godini.

#### **Član 4.**

Konkurs za prijavu i predaju studentskih završnih radova, semestralnih projekata i naučno-istraživačkih radova objavljuje se svake tekuće školske godine prvog ponedjeljka u mjesecu novembru putem zvanične web stranice Fakulteta i ostaje otvoren do zadnjeg radnog dana mjeseca novembra.

#### **Član 5.**

Izbor nagrada se vrši između završnih radova i semestralnih projekata nominiranih od strane katedri i radova koje samostalno prijavljuju studenti na konkurs.

Naučno-istraživačke radove drugog i trećeg ciklusa nominiraju članovi Vijeća doktorskog studija. Prijedlog za dodjelu nagrade se donosi većinom glasova prisutnih članova Vijeća doktorskog studija, a usvaja ga Vijeće nastavnika Fakulteta.

#### **Član 6.**

Prijedlog užeg izbora završnih radova i semestralnih projekata za javnu prezentaciju, kao i konačnog izbora studentskih nagrada Fakulteta vrši Komisija za odabir studentskih radova i dodjelu studentskih nagrada Vijeća Fakulteta.

Članovi Komisije, na prijedlog Vijeća Fakulteta, se biraju na mandat od dvije godine, uz mogućnost produženja mandata za još jedan ciklus.

Komisija se sastoji od 5 članova, od čega minimalno tri iz reda akademskog osoblja Fakulteta.

#### **Član 7.**

Rad na izboru najuspješnijih studentskih radova Fakulteta započinje prvog radnog dana u mjesecu januaru tekuće školske godine.

Prijedlog Odluke sa imenima studenata dobitnika nagrada i obrazloženjem za tekuću školsku godinu, Komisija i predstavnik Vijeća doktorskog studija podnosi Vijeću Fakulteta do 1. marta tekuće godine.

Vijeće Fakulteta usvaja Odluku do 20. marta tekuće godine, u cilju blagovremene pripreme za izložbu i promociju nagrada.

#### **Član 8.**

Nagrade se dodjeljuju svake godine na Dan Fakulteta - 6. aprila.

U cilju promoviranja akademske i profesionalne izvrsnosti Komisija Fakulteta za svaku kategoriju dodjeljuje jednu nagradu godišnje.

Komisija zadržava pravo da za određene kategorije dodijeli više od jedne nagrade, odnosno ne dodijeli niti jednu nagradu Fakulteta. Ovo pravo će se koristiti izuzetno i bit će pismeno obrazloženo Vijeću Fakulteta koje donosi konačnu Odluku o ovoj vrsti izuzetaka.

#### **Član 9.**

Nagrade, definirane Članom 2. stavak 2., rezultat su saradnje Fakulteta, podorganizacione jedinice ili predmeta sa različitim institucijama na međunarodnom nivou, nivou države, entiteta, kantona i općine, firmama, fondacijama i udruženjima iz

oblasti arhitekture, umjetnosti, nauke i obrazovanja, u okviru kurikularne ili vankurikularne aktivnosti – putem organiziranog studentskog natječaja.

Sa svim definiranim aktivnostima, procedurama i dogovorenoj saradnji sa različitim institucijama, firmama, udruženjima i fondacijama bit će blagovremeno informirano Vijeće Fakulteta.

Nagrade studentima se dodjeljuju u tačno određenom terminu i odnose se na kurikularne ili vankurikularne aktivnosti provedene u prethodnoj ili tekućoj školskoj godini.

#### **Član 10.**

Nagrade, definirane Članom 2. stavak 3. i 4., nominiraju se od strane akademskog osoblja, selektiraju od strane upravnih struktura Fakulteta (Dekan, prodekani i šefovi katedri) i usvajaju na Vijeću Fakulteta.

#### **Član 11.**

Komisija u slučaju novih saznanja koja nisu u skladu sa pozitivnim akademskim i profesionalnim standardima Fakulteta, upućuje prijedlog Odluke o oduzimanju prethodno dodijeljenih nagrada, priznanja i zahvalnica Fakulteta.

Na osnovu prijedloga Komisije Vijeće Fakulteta donosi Odluku o oduzimanju prethodno dodijeljenih nagrada i zahvalnica Fakulteta.

## **II - KATEGORIJE I NAZIVI I KRITERIJI ZA DODJELU NAGRADA I ZAHVALNICA ARHITEKTONSKOG FAKULTETA UNIVERZITETA U SARAJEVU**

#### **Član 12.**

Nagrade, imenovane po renomiranim profesorima Arhitektonskog fakulteta Univerziteta u Sarajevu, podijeljene su u sljedeće kategorije:

- 1. Nagrada „Juraj Neidhardt“ za najuspješniji studentski završni projekat,**
- 2. Nagrada „Dušan Smiljanić“ za najuspješniji studentski semestralni projekat,**
- 3. Nagrada „Husref Redžić“ za najuspješniji studentski naučno-istraživački rad,**
- 4. Nagrada „Jahiel Finci“ za izniman doprinos na unapređenju, razvoju i promociji arhitektonske profesije,**
- 5. Nagrada „Muhamed i Reuf Kadić“ za stvaralački iskorak u arhitekturi,**
- 6. „Zahvalnica Dekana“ za uspješnu saradnju sa Fakultetom;**

#### **Član 13.**

Način obezbjeđivanja eventualnih finansijskih sredstava za ovu namjenu posebno će se definisati odlukom Vijeća Fakulteta svake tekuće godine.

#### **Član 14.**

Kriteriji za dodjelu studentskih nagrada, definiranih Članom 2. stavak 1. i 2. i Članom 12. stavak 1., 2. i 3. ovog Pravilnika, zasnivaju se na principima izvrsnosti i visokim akademskim i profesionalnim standardima arhitekture, kreativnog potencijala, inovativnosti, istraživačkog doprinosa, vizuelne i opšte kulture i kvalitete prezentacijske

forme koje članovi Komisije prepoznaju i valoriziraju kao izuzetno vrijedne na nivou elemenata i cjeline nominiranih studentskih radova.

Kriteriji za dodjelu nagrada zaslužnim pojedincima, definiranih Članom 2. stavak 3. i Članom 12. stavak 4. ovog Pravilnika, zasnivaju se na višegodišnjem javnom angažmanu i iskazanim organizacijskim sposobnostima pojedinca, usmjerenim ka unapređenju, razvoju i promociji arhitektonske profesije.

Kriteriji za dodjelu nagrada zaslužnim pojedincima, definiranih Članom 2. stavak 3. i Članom 12. stavak 5. ovog Pravilnika, zasnivaju se na dosegnutim principima izvrsnosti i visokim akademskim i/ili profesionalnim standardima, prepoznatom kreativnom potencijalu i stvaralačkom iskoraku u arhitekturi, iskazanom u prethodnoj kalendarskoj godini.

Kriteriji za dodjelu zahvalnica firmama, fondacijama, udruženjima i pojedincima su definirani u Članu 2. i 3. ovog Pravilnika.

### III - PRELAZNE I ZAVRŠNE ODREDBE

#### Član 15.

Prezentacijske forme, grafički dizajn i obrada nagrada i zahvalnica Fakulteta, bit će predmetom aneksa ovog Pravilnika, kojeg usvaja Vijeće Fakulteta.

#### Član 16.

Izmjene i dopune ovog Pravilnika vrše se na način i po postupku po kojem se Pravilnik odnosi.

Broj: 05-275/1-20

Datum: 13.02.2020.

Dekan Arhitektonskog fakulteta:



*[Handwritten signature]*  
Prof. dr Erdin Salihović, dipl.ing.arh.

Sarajevo, februar 2020.